

Leetal ya eepoñee ya pakati
Filipoy
Filipoy
Waah wa weeyem wa ti leetal
eyye

Aluu pakanam ti káyinan keeyemaam ka ti káasiitan, inci kicanaa.

Leetal eyya nuuyemaa ya fiye ti káasiitan, Póol akiice yo, akina ti núkuluma. Póol apoñapoñ a ati Eenucee ya, Yéesu Krista. Naakiic yo ti kéeyinane ka pakati canku ya eeyem ya ti saatee ya eti Filipoy. Canku eyyu, Póol asiinjane yo. Naakalañan toko, le nin afaawantee ti núkuluma.

Akina ti núkuluma ya, kéeyinane ka pakati Filipoy nkawantool sipees, nkawufan mañ ma akee áyiin aña nkasok Epaflotit apucoopoo mo. Ekina ewune, Póol naakiic leetal eyye, apusokii apalaka.

Ti leetal eyye, naapenanii páhaañi kati kato to ti káyinan ka kiteyii hátikin keepookii ka nkáyemiyii ti kaakallan. Naasokii kataak tan óo tan pásuuma, nkaluum Pútuun pa nkasok po apalaka ti waah óo waah. Naalompo asokii, timpí kásiitan pakakee pikalañana pa keeneetaat ka ti kakalañan kiti ekoonjan ya éesume ya eti Yéesu Krista.

Ti kayonj ka kiti pikalañana pa keeneetaat pa pánipani payenkuu, intaak pakakee keecoke

kíp ti cosaan ya eti Pusuwif pa. Ti cosaan ya eti Pusuwif pa, nkanakan-nakan epuukii nin kataakaa kunoom isak nin kíhaaciil samat nii fa Pútuun pa mpusoke fa Abraham maamaa ateyii. Kanakan enkuu kikina kiyem píyisan pa piti písiyool pa empa Pútuun pa mpiliile pa nin pakan etempo. Pale pamuusal eket ya nin pilito pa piti Yéesu, kanakan enkuu ki-taakut nene nafaa, kaatuko Yéesu afakane unaa pale neetaat kanakan. Ti caanak ca citi Póol, pakakee pikalanana pa keeneetaat ka pánipani payenkuu, nkasok nii an anakanutee ayinaatee kafakan, ekina ewune Póol náañiken meemak, kaatuko kaalehanool kanakan nkayaake nin Yéesu Krista.

Naasokii lombo kati kawananooolo fanjii samat nii Yéesu, nkacok pakakee paka pahan fa nkacoke fa fanjii. Ancuk kati káyini piyeno pakoonool. Naasokii, eloŋ ya eti Yéesu nkañañe káyipenan. Nkáyipenan lombo ñíhampaatiin ña pakati canku ya, keeyem ka ti eloŋ samat nii Yéesu. Ti piyeno pakoonool nuuyinaa pisiño kíp ti káyinan ka kiti unaa ti ekoonan ya éesuume ya.

Alaapalaka ti káasiitan ka kitaaluu. Alímaati Pútuun pa púwiiniyan saan unaa mpípankin kunuu unaa kati úyiniyaa kasayan hilim etempo ti caacaw Añii etempo Yéesu Krista. Amíini.

Kakican ka

¹ Añe inci Póol nin Timote, pimiikan pakati Yéesu Eenucee ya, ukicanaa aluu púloŋ. Inci oopa ti hikiicu aluu keesampanee ka pakati

Yéesu Krista keeyem ka ti saatee ya eti Filipoy, niŋ pakati kikaw ka pakati aluu niŋ piyankanana pa pakateyii.

II Alímaati Pútuun pa Paapaa ati unaa niŋ Ateeteyo Yéesu Krista kasampan aluu, nkawufan aluu kásuumaay.

Hisoku ha hiti Póol Pútuun pa apalaka

III Tan óo tan ta kunuuwam nkílike aluu, insok Pútuun pa piti unaa apalaka.

IV Illumluum niŋ pásuuma, tan óo tan ta inci iyyeniye kaluum kiti aluu púloon,

V kaatuko niyankananaam-yankanan káatuunan ekoonan ya éesuume ya, kápiliŋ hinak ínnyaañe yo ta hísiyu fo fiyooy.

VI Eehe íhiiniyaam-híini hat nii: Pútuun pa peeyem pa ti íhinu páhin pa peenape empe ti aluu kápiliŋ ta ínnyinane ta, efiputowo po ti íhinu fo pipa ta Yéesu Eenucee ya naakaakaay ta éñhoonii.

VII Napaanap fa inci intaake fa pámiiloolal pa peenape empe ti aluu púloon, kamma uwwase aluu ti yaanam. Kaatuko man inci oopa ti núkuluma, niŋ fotom ti pisiño ekoonan ya éesuume ya píyisan nii eti pánipani, inci niŋ aluu pakoonool ti kaasampan ka kiti Pútuun pa.

VIII Pútuun pa pímeyimayi nii inci láfilafi aluu púloon ti yaanam samat nii fa Yéesu Krista náalafiye fa aluu.

IX Eehe inci illum Pútuun pa kiti aluu: Pútuun pa píhin pálaŋi pa piti aluu pípipenano pihanhan toko, innitaak kameye pántoon, ínnyemi pakati kunuu kenfakat.

X Fiyuu inniyina kayesal heehaṇe ha panap, ancuk kati nikuul, étiniyiniyee kawatan ti waah fo ta hinoom eeha Eenucee ya ati Pútuun pa naakaakaay ha éñohoonii.

XI Eloṇ ya eti aluu lombo neemeen niṇ páhinal peenape samat nii enuun eyya nepuk papukal peenape, pínapii ti Yéesu Krista, ancuk Pútuun pa kati pímakiyanee mpúmulee.

Eloṇ niṇ eket ti Eenucee ya ati Pútuun pa

XII Pakanam ti káyinan, láfilafi nípimeyi nii heetaakiyaam ha hiwune, hícomp pakan nkáyemi ti hísiyu ekoonan ya éesuume ya pihaṇṇaṇ toko.

XIII Ekina ewune pusoocaali pa púloṇ payenka nkafaas ka ékinuma ya eti amansa ya ati Room niṇ pakakee paka púloṇ nkámeyi nii inci oopa ti núkuluma kamma iyyem ti páhin Eenucee ya.

XIV Keehaṇe ka pameen ti kéeyinane ka lombo, ta nkásiye ta nii inci oopa ti núkuluma, nkahaṇ toko nkáyinane Ateeteyo, nkataak púsus piti káatuunan ekoonan ya éesuume ya peefeyut.

XV Pánipani pakakee paka, ti paheeka niṇ ti páhaṇool nkáatuunan kiti Eenucee ya, pale pakakee paka ti yaan eekuule.

XVI Payenkuu nkáhinhin ho kamma nkálafiyaam, nkámeyi nii inci oopa le ti pisiṇo ekoonan ya éesuume ya.

XVII Pale pakakee paka, káatuunanantoo kiti Eenucee ya ti yaan eekuule pale ti páhaṇool, pucukii nii éfikahinam pihan incuke kúnuul ti núkuluma ne.

XVIII Eehuu waah tom! Man pámiiloolalii peenape nin fottom peenaput, heehaŋe ha hitaaku hikaw hiyem, fan óo fan incuke, kiti Eenucee ya nkátuunan, apan eehuu nihiwufanam pásuuma.

Ee efhitowiyam ti kawufan pásuuma,

XIX kamma inci immeya nii, heetaakiyaam ha púloon, efhitempo ti pikelan. Inci fafakanee pínapii ti kaluum ka kitaaluu nin kayankanan ka kiti Kunuu ka keenape ka kiti Yéesu Krista.

XX Pánipani eeha inci iyyem ha ti hítuulu nin eeha inci ínhine ha cíki hiyem: inci étihin eeha efhisuuwanam, pale intaak páhaañi samat nii fa inci intaak fa tan óo tan páhaañi. Pínapii ti páhaañi empe, Eenucee ya áfaamakiyanee kamma inci, man nin inci ketaa, nin fottom íyyemi kalonja.

XXI Kaatuko ti inci, Eenucee ya ayem elon ya etoom, apan efisakam nin inci ketaa.

XXII Pale nin inci oopa kalonja ti púlunta empe, inci fáhin páhin peetaake nafaa. Ooto ti pututa eket nin elon, míit eeha inci famamal.

XXIII Kunuuwam unka kinakanooliye ti waah wa úsupak ewwe: láfilafi eket kati yeno nin Eenucee ya, eehuu hifisaka fo muus.

XXIV Pale haŋa pitempo ti aluu inci píyemi kalonja.

XXV Páawoo eehuu íhiiniyaam-híini, inci méyimeyi nii fayeno kalonja, iyyeno nin aluu ancuk kati yankanan aluu nipikaay hátikin, innitaak pásuuma ti káyinan ka.

XXVI Ancuk nin inci ñóhooniyoo pati aluu,

innihan innimaayooliye ti Yéesu Krista kamma inci.

Eloŋ ya eti ekoonan ya éesuume ya

XXVII Fan óo fan intaakiye, eloŋ ya eti aluu étuuno samat nii kéeyinane ti ekoonan ya éesuume ya eti Eenucee ya ati Pútuun pa. Inníhinaa fo, niŋ inci kéyyoo ti aluu niŋ foton, kéyyoot hiyoop aluu, ínsi nii aluu unka nicoke piliit ti pámiiloolal poonool. Fiyuu inci fámeysi nii nicokoolaa-cokool, innisiyool innicok piliit hátikin keepooke ka ekoonan ya éesuume ya, inniñañahool kati nítuunan yo.

XXVIII Timpi nikat keepooke ka aluu kapifeyanool aluu ti waah: tempo éfikameysi nii éfikapucalooloo pale aluu innifakanee. Eehuu pati Pútuun pa níhifulii.

XXIX Kaatuko Pútuun pa puwunut aluu nípiyinan lamma ti Eenucee ya, pale nipicuk lombo kúnuul kamma akina.

XXX Inci niŋ aluu ti esuum ya yoonool ya nu-uyemaa. Esuum ya yoonool ya eyya innicukaam ya teyyo, innisi fiye nii inci loŋaa teyyo.

II

Káyipenan ewananoolo ya eti Eenucee ya ati Pútuun pa

¹ Fo eloŋ ya eti aluu niŋ Eenucee ya, ewu-fanaawufan aluu páhaañi? Fo pálaŋi pa piteyoo píhinaahin aluu nípiwaayeen? Fo nitaakaataak himpaac ti Kunuu ka keenape ka? Fo Eenucee ya anapaanap ti aluu, naataak paket hikaw ti aluu?

II Ooto níhin púsuumam pántoon: nílafooli, nísiyool ti pámiiloolal poonool, saan aluu in-siyeno soonool ti waah óo waah.

III Timpi ínnihin waah uti páhañool niñ fotom éyisanoolo. Pale niwananoolo, ínnimiilool pakakee paka pihanñ fañ aluu.

IV An óo an añes héesuume ha pakakee paka pale hiteyoo lamma tom.

V Nímiilool samat nii Yéesu Eenucee ya.

VI Kápiliñ ti púcook pa akina oonooluu niñ Pútuun pa,
apan acokut piliit ti hilehu ha hiteyoo niñ Pútuun pa.

VII Pale naawaat fañoo ti waah óo waah ewwa naataake,
naapukee nii an,
fo náayenoonii amiikan.

Ta náayenoonii ta an,

VIII naawananoolo, náatuul Pútuun pa fo aket,
apan naaket ti kuluwaa.

IX Ekina ewune, Pútuun pa mpisilanoo la hañe la pamake,
mpuwufanoo lombo caacaw ca ceehañe ca caacaw óo caacaw.

X Ancuk keeyem ka alacana, keeyem ka t'etaam,
niñ keeyem ka páhantuwa etaam ya,
niñ caacaw ca citi Yéesu ciluwee,
káacuun óo káacuun éfikikilipo,

XI híleeluuf óo híleeluuf efihisayan nihisok nii,
Yéesu Krista ayem Ateeteyo,
ancuk Pútuun pa Paapaa ya pímakiyanee.

Ecaañ ti púlunta pa

XII Ooto pákawiyam ti káyinan, nítuulaatuul tan óo tan Pútuun pa ta inci iyyeniye ta nin aluu, pale páawoo inci neetaat puu fiye nin aluu, niñañaa po hítuulu pihanj toko. Níhin kata óo kata kati níyisan nii nifakaneefakan, te níhin ho nin ewatate nin kakikilan hátikin Pútuun pa.

XIII Kaatuko Pútuun pa piyem ti páhin ti aluu kati níla fi eeha mpíla fiye ha, ínnihin ho lombo.

XIV Níhin waah óo waah péekumutoolut nin fotom péelaacinoolut,

XV ancuk niyeniya epuuk Pútuun pa keekuule nkacoonool. Háati fa innikine fa ti pututa pakan keenaput nkakanc, étiniyiniyee kawatan ti waah. Fiyuu efiniyeno ecaañ teyii samat nii picaañ pa piti útiju wa,

XVI ti káyisanii hilim ha hiti eloñ ya. Inníhinaa eehuu, inci fáyini emaayoolo kamma aluu ti hinoom eeha Eenucee ya ati Pútuun pa áfaañohonii ha, insok nii páhin pa putoom púloñ pineetaat páhin kenseñ, kúnuul ka kutoom púloñ lombo kineetaat kúnuul kenseñ.

XVII Heenape ha eeha ínnihin ha héefulii ha ti káyinan ka kiti aluu, hicukaacuk nii kaawaaseen kéesuume Pútuun pa. Pikee pa efikamukam, pale nin eehuu hitaakiyaa, hisimam efihini-isee hipihankan kaawaaseen enkuu, ínsuumam meemak intaak pásuuma nin an óo an ti aluu.

XVIII Fo lombo incuke, nitaak pásuuma nin inci.

Timote nin Epafлотit

XX Nin súumaa ti Ateeteyo Yéesu, inci fápoñii ti aluu Timote toko fiye, ancuk waniyaam ti eeha inci inkaakaay ha hísiyu héefulii ti aluu.

XX Inci taakut an eetaake aluu ti yaanoo samat nii akina.*

XXI Pakakee paka púloon kiti fanjii nkámiilool, pale neetaat kiti Yéesu Krista.

XXII Pale nímeyimeyi fa Timote náayisane fa nii akina an eenape, kaatuko áhinaahin nin inci ti káatuunan ekoonjan ya éesuume ya, samat nii fa añii nayankanan fa paapaa ateyoo.

XXIII Ooto láfiyoolafi époñii ti aluu nin inci meya heekaakaayam ha pitaako.

XXIV Apan intaak cíki ti Ateeteyo nii, inci lombo etifiyo fákey puu ti aluu.

XXV Inci ímmiilool nii napaanap píñahanii aluu Epaflotit, an unaa ti káyinan, aña ínnipoñii ya peti inci kati ayankananam ti waah ewwa inci insoolahe wa. Akina áwiyaam ti páhin pa nin ti pítaakool pa piti káatuunan ekoonjan ya éesuume ya.

XXVI Náalafi meemak kati acuk aluu púloon, kunuuwoo kitempanut kamma ínnisiye nii ákuuñaaakuuñ.

XXVII Páni ákuuñaaakuuñ hínum, fo alohan eket, pale Pútuun pa mpitaak paket hikaw teyoo, te pilehut teyoo lamma pale focaa ti inci lombo, ancuk kúnuul ka kutoom timpí kihan toko.

XXVIII Ekina ewune inci inhan toko inhiliikane fanfan púpoñiyoo ti aluu, ancuk innicukoo nene

* **II:XX 2:20** Nin ekina tom: “Nin neetaat akina, inci taakut an eetaake aluu ti yaanoo samat nii inci.”

innitaak pásuuma, inci lombo kúnuul ka kutoom nkíkaasino.

XXIX Ooto niwananoo pinap ti caacaw ca citi Ateeteyo nin pásuuma penfakat. Nímakiyan pakan paka payenkuu fiyaaw.

XXX Kaatuko caahinkilis naaket kamma páhin pa piti Eenucee ya ati Pútuun pa. Naanan eloŋoo kati ayankananam kayankananan enka in-niyinaatam ka kayankananan.

III

Pucoonool pa peeyem pa pánipani

I Pakanam ti káyinan, ehe hilimam hike-lan. Nitaak pásuuma ti Ateeteyo! Inci fasok aluu nene eeha impaye ha aluu hikiicu, ee-huu etihiyokanam, apan efihifaas aluu ti pikee pakalaŋanal pa.

II Nitah kunuu ti payenka nkasok ka nii an anakanutee ayinaatee kafakan.* Payenkuu pakan keekance! Nkafiitfiit enii ya kenseŋ! Nkanakool nii piyen!

III Keenakanee ka pánipani poko kayem unaa. Kaatuko unaa nuulumaa Pútuun pa ti sempe

* **III:II 3:2** Ti cosaan ya eti Pusuwif pa, nkanakan-nakan epuukii nin kataakaa kunoom isak nin kíhaaciil samat nii fa Pútuun pa mpusoke fa Abraham maamaa ateyii. Kakanan enkuu kikina kiyem píyisan pa piti písiyool pa empa Pútuun pa mpiliile pa nin pakan etempo. Pamuusál eket ya nin pilito pa piti Yéesu, kakanan enkuu kitaakut nene nafaa, kaatuko Yéesu afakane unaa pale neetaat kakanan. Ti caanak ca citi Póol, pakakee Pusuwif nkasok nii an anakanutee ayinaatee kafakan, ekina ewune Póol náañiken meemak, kaatuko kaalehanool kakanan nkayaake nin Yéesu Krista.

sa siti Kunuu ka keenape ka, nuumaayooliyaa ti Yéesu Krista, apan úyinanutaa nii hítuulu cosaan eti pakan efihifakan unaa.

IV Inci himuumam, taakaataak hícump waah weewune kati yínan nii, hítuuluyam hiti cosaan eti pakan efihifakanam, an aneetaat po eelehe niñ inci ti eehuu!

V Inci nakaneenakan ta inci impukee ta pitaak kunoom isak niñ kíhaaciil. Inci ati Israyel, ti miin ma miti Benjamin. Símaamayam púlooj Pihiburu, apan inci Afalisaay, íntuul pinap hilim ha heesiñanee ha hiti Móyiis.

VI Inci cokaacok pítin pa meemak, fo inkallane kéeyinane ka ti Eenucee ya. Inci hínaahin fa hilim ha heesiñanee ha nihisoke fa, fo an naayinaatam kawatan ti waah.

VII Inci cukaamcuk hínum nii eehuu heetaake nafaa ti inci, pale fiye hitaakut nafaa ti inci kamma Eenucee ya.

VIII Etileh ti eehuu lamma. Incok waah wa púlooj nii utaakut nafaa, kamma heehaṇe ha waah óo waah, hikina hiyem kameye Yéesu Eenucee ya Ateeteyo atoom. Waah óo waah inci inkatane kamma akina. Incok wo nii pilenkesuun, ancuk taakaa Eenucee ya,

IX iyyeno oonool neyoo. Fiye cokat faṇam nii eecoonoole kamma íntuule hilim ha heesiñanee ha, pale káyinan ka kutoom ti Eenucee ya kuwune iyyeno eecoonoole. Kaatuko Pútuun pa mpíhin an apiyeno eecoonoole pínapii ti káyinan ka kiteyoo.

X Eeha inci inhaṇe ha pálaṇi, hikina hiyem kameye Eenucee ya, niñ sempe sa séelitaniyoo

sa ti eket ya. Láfilafi lombo éyenoonii oonool neyoo ti ñíyoka ña ñiteyoo, innakool neyoo ti eket ya.

XI Mantefa niŋ súumaa ti Pútuun pa, fálitaniyee ti eket ya.

Ihínu kata hiñocu hátikin

XII Inci sokut nii payaapa hicuku nii fa Pútuun pa mpílafiye fa. Eehuu inci iyyem ti hiñes, pale sokut nii payaapa ho hitaaku. Apan fo fiye inci loŋaa ti kaateteyool ancuk yina ho patoohe. Eehuu Yéesu Eenucee ya náalafiye. Ekina ewune náahinam ateyoo.

XIII Pakanam ti káyinan, inci cukutam nii toohitoohi ho, pale waah woonool lamma inci ínhin: inci inífilíil heeyem ha pusonam, ínhin kata kati toohi heeyem ha hátikinam.

XIV Inci oopa ti kaateteyool tan óo tan kati taak cooy ya. Cooy eyyuu etoom, kaatuko Pútuun pa piyonkalaam-yonkal pínapii ti Yéesu Eenucee ya kati loŋ alacana.

XV Ooto unaa kéetuuniyaa ka ti pítin pa piti Pútuun pa, fiyuu nuuñañaa káamiilool. Niŋ pakakee ti aluu kataakaa pámiiloolal peekufut niŋ empe, Pútuun pa éfipiyisan aluu tooñaa ya picaaŋ.

XVI Fan óo fan incuke, unapanaa pítin empa nuucokaa pa.

XVII Pakanam ti káyinan, aluu púloŋ níyipenan eloŋ ya etoom, innisincan lombo eloŋ ya eti payenka nkalŋ ka samat nii unii.

XVIII Kaatuko inci insoksok aluu hínum innene sok aluu fiye niŋ mukun nii, hícum pakan

unka ti elonj samat nii pikamool kuluwaa ya eti Eenucee ya.

XIX Payenkuu, eeha nkálafiye ha hili lamma nkacuk, apan eeha nkañaje ha hisuuwu, hikina nkámakiyanoolo neeho. Waah wa uti etaam eyye lamma nkámiilool, ántuñ éfikapucaloolee ti pikelan.

XX Pale unaa pakan pakati alacana, nuulonjaa ti hítuulu Afakana ápufulii po, Ateeteyo Yéesu Krista.

XXI Niñ áñohtooniyoo, afaayesan sinii unaa seetaakut sa sempe, ápihin so samat nii eteyoo ya eemaka ya. Afáahin eehe pínapii ti sempe sa séehinoo sa ati hikaw ha ati waah wa púloonj.

IV

Kawun kunuu

I Ooto pakanam ti káyinan, inci láfilafi aluu, illompo láfi nene hicuku aluu meemak. Aluu niyem pásuuma pa putoom niñ heewune ha inci immaayoolo. Enka inci insoke ka fiye púloonj, káluma, nicok piliit fiyuu ti Ateeteyo.

II Inci oopa ti kaluum Ewoti niñ Sinitik, pakaal paka pákasupak paka payenkuu keeyem ka ti canku ya eti aluu. Illuumii nii, pámiiloolalii piyeno poonool, kaatuko poko pakati Ateeteyo.

III Awe lombo eeyem a áwiyam enfakat ti páhin pa, káluma yankanan pakaal paka pákasupak paka payenkuu. Kaatuko inci niñ poko uyeniyé ti oom kaañañahool ka kiti káatuunan ekoonjan ya éesuume ya. Intaako lombo Kelemanj niñ pakakee pákawiyam púloonj keeyem ka ti páhin

nin inci, payenka Pútuun pa mpikiice ka ucawii ti púkoo ya eti eloŋ ya.

IV Nitaak pásuuma tan óo tan ti Ateeteyo. Innene sok: nitaak pásuuma!

V Níyisan pakan paka púloon nii aluu kéesumanana. Ateeteyo alohaaloh unaa.

VI Timpi niwasoolo kúnuul ti waah, pale waah óo waah ewwa inniyem ti íhinu, niluum Pútuun pa innisok po aŋa innisoolahe ya. Innisok po lombo apalaka.

VII Fiyuu kásuumaay ka kiti Pútuun pa, enka an naayinaat ka hipayu kameye, efikifaas saan aluu nin pámiiloolal aluu ti Yéesu Eenucee ya.

VIII Pakanam ti káyinan, ehe hilimam hike-lan. Innicukaa waah weeyem páni nin fotom ewwa éfuumakiyane, niwas wo ti kikaw aluu innimiilool wo. Waah óo waah weecoonoole, weekuule, wéesumanana nin weeŋaŋee hicoku sipees súsupak, nímiilool wo. Nin waah uyema weenape nap, nin fotom weeŋaŋee hímulu, nímiilool wo.

IX Apan eeha innikalaje ha ti inci púloon, eeha innisiyaam ha ti hisoku, nin eeha innicukaam ha ti íhinu, níhin ho lombo. Fiyuu Pútuun pa empa mpuwufan pa kásuumaay efipiyeno nin aluu.

Póol hisoku ha hiteyoo apalaka ti aŋa canku ya eti Filipoy neewunoo ya

X Inci taakaataak pásuuma penfakat ti Ateeteyo, kaatuko nene níyisanaayisan ti pikelan nii, kunuu aluu unka ti inci. Neetaat ti hisoku nii kunuu aluu kineetaat fiye ti inci, pale nitaakut hínum pítin piti káyisanam ho.

XI Inci sokut eehuu kamma inci insoolahe waah. Haani! Kaatuko inci, eeha inci íyyipene ha hiyem: waah óo waah ewwa inci intaake, ufomaamfom.

XII Inci yíniyini elonj ti palek, íyyini elonj nin inci taakaa ñác. Yípenaayipen elonj fan óo fan, háati puume incuke, man munowam meesiite nin fotom peep mpucokam, man taakaa ñác nin fotom caahinkilis.

XIII Inci yíniyini íhinu eehuu púloonj kaatuko Eenucee ya ati Pútuun pa awufanaam sempe.

XIV Pale aluu, níhinaahin heenape fa in-niyankananaam fa ti kúnuul ka kutoom.

XV Aluu pakati Filipoy nímeyimeyi eehe meemak: ta inci impaye ta káatuunan aluu ekoonjan ya éesuume ya, ínful ti mah ma miti aluu miti Masetoni, ínkaatuunan yo ti mikee mah. Ti oom caanak, ti picanku pa púloonj, aluu lamma niyankananaam ti waah ewwa insoolahe wa.

XVI Háati ta inci iyyeniye ta Tesalonik, ínnipoñiyam poonool tom waah ewwa insoolahe wa.

XVII Inci ñesut nipiwnam nene waah. Eeha inci íllafiye ha hiyem, cooy eyya Pútuun pa efipucooy ya aluu kati efom meemak kamma panap pa pitaaluu.

XVIII Inci sayaasa waah wa púloonj ewwa ínnipoñiyaam wa, apan nuumeenj fo muus. Kápilinj emma Epaflotit náacoopiyaam wo, fiye inci taakaataak waah óo waah ewwa insoolahe. Waah ewwa inniwufanaam wa ucukaacuk nii kaawaaseen kiti élukuleen eeyemee ti kaalee-man enka ammeya nii, haaw ha hiti háaputa

eteyyo níhisuum Pútuun pa; kaawaaseen enka Pútuun pa mpisayane, ínsuum po.☆

XX Pútuun pa piti unaa, peetaake pa hisaanu-mate henfakat ti hamake etempo, efipuwu-fan aluu waah ewwa innisoolahe wa púloon, éfipihin ho pínapii ti Yéesu Eenucee ya.

XX Pútuun pa Paapaa ati unaa púmulee fo cancowiyaaw púley. Amíini.

Kakican kikelan

XXI Nikicanam keesampanee ka púloon ti Yéesu Eenucee ya. Pakan unaa ti káyinan keeyem ka nin inci, kakicanaa aluu.

XXII Keesampanee ka púloon pakati Pútuun pa keeyem ka pe, kakicanaa aluu, picaahan keeyem ka ti ekumpaan ya eti amansa ya enfakat a ati Room.

XXIII Alímaati Ateeteyo Yéesu Krista asampan kunuu aluu.

Kuloonaay
Karon: Kuloonaay (Portions)

copyright © 2018-2025 Wycliffe Bible Translators, Inc.

Language: Karon

Contributor: SIL International (in Africa)

All rights reserved.

2025-07-11

PDF generated using Haiola and XeLaTeX on 10 Jul 2025 from source files
dated 11 Jul 2025

404e2c05-c6eb-5f56-8cae-50a5b595ef9a